

Fundacion Adopt An Addict mester di ayudo financiero Ya cu e gastonan ta keda acumula

ORANJESTAD - Fundacion Adopt An Addict a ser lanta pa crea un solidaridad y compromiso social pa yuda soluciona e problematica di choller den nos comunidad.

Sr. Frank Tieleman di fundacion Adopt An Addict a bisa cu nan mester lucha basta ainda pa nan por haya e cooperacion financiero den e proceso humanitario pa nos comunidad adopta e adictonan.

E prome aña cu nan a sali nan a haya basta yudansa, pero aworaki e ta mas dificil, ya sea pa situacion financiero di comercio en general. E ta kere cu esaki por hunga un rol ya cu pa e sector aki ta mas duro pa saca placa facil pa yuda e fundacion aki.

Actualmente e fundacion aki cu ta haciendo un tremendo trabou pa alivia e problematica di choller den nos comunidad ta trahando riba un proyecto nobo pa haya mas sponsor, ya cu esaki ta e base di e programa aki. Sr. Tieleman ta indica cu nan mester di ayudo financiero ya cu e gastonan ta keda acumula keto bay di un forma increibel.

E tratamento cu e hendenan aki cu a cay den problema di droga ta uno costoso. Nan ta bay na e centro di rehabilitacion di "Hogares Crea" na Republica Dominicana. Pero ora cu nan ta yega pa ser trata ta bin acerca mas gasto adicional, ya cu p.e. algun di nan tin problema cu bista, y nan mester bril pa por lesa. Tambe nan tin problema cu djentenan, y nan mester drecha nan. Nan ta situacionnan adicional cu ta crea un gasto inmenso riba e fondo limita di e fundacion aki. Tur esaki ta cosnan adicional -segun sr. Tieleman- cu nunca a ser conta den e total cu a ser presupuesta pa cada adopcion di un adicto.

"Esaki ta keda acumula riba nos lomba, y pesey nos ta

keda busca sponsornan", asina el a bisa.

Igualmente nan mester di ayudo di sponsor pa e cas cu nan tin pa aloca e adictonan rehabilita ora cu nan ta bin bek for di Santo

Domingo. E fundacion ta pagando huer pa e cas aki cu actualmente tin cuater cliente y e director, y nan tin luga pa 16 cliente. E ta aclaria cu esaki no ta un cas di rehabilitacion, e ta un "half-way house",

ya cu entre otro nan no tin terapistanan of profesionalnan pa rehabilita e hendenan aki. E yudansa cu nan ta brinda ta pa manda e adictonan pa rehabilita nan den "Hogares Crea" na Rep.

Dominicana.

E ta aclaria esaki ya cu esaki ta un concepto cu generalmente e hendenan ta bruha, ya cu e fundacion aki mes no tin un centro of cas di rehabilitacion di adictonan. □